

Bosna i Hercegovina  
Federacija Bosne i Hercegovine  
KANTON SARAJEVO  
MINISTARSTVO UNUTRAŠNJIH POSLOVA  
UPRAVA POLICIJE  
SARAJEVO

Broj: 02-276  
Dana: 15.10.2018. godine

SKUPŠTINA KANTONA SARAJEVO  
NEZAVISNI ODBOR  
N/r predsjednika

PREDMET: Izvještaj o radu policijskog komesara za period  
juli-septembar 2018. godine, dostavlja se.-

Poštovani,

na osnovu odredbi člana 45. stav (2) Zakona o unutrašnjim poslovima Kantona Sarajevo, u prilogu akta dostavljam Vam na upoznavanje i nadležno postupanje Izvještaj o radu policijskog komesara za period juli - septembar 2018. godine.

PRILOZI: Kao u tekstu.-

POLICIJSKI KOMESAR  
Generalni inspektor policije

Mevludin Halilović

15.10.2018

# IZVJEŠTAJ

## O RADU POLICIJSKOG KOMESARA ZA PERIOD JULI-SEPTEMBAR

### 2018. GODINE

Kao rukovodilac Uprave policije u Ministarstvu unutrašnjih poslova Kantona Sarajevo (u daljnjem tekstu: Uprava policije), u vremenskom periodu juli - septembar 2018. godine, u skladu s ovlaštenjima datim odredbama člana 23. Zakona o unutrašnjim poslovima Kantona Sarajevo ("Službene novine Kantona Sarajevo", broj 1/16, u daljnjem tekstu: Zakon), kao i odredbama drugih relevantnih zakonskih i podzakonskih propisa, te Planom aktivnosti policijskog komesara u cilju unaprjeđenja rada Uprave policije u vremenskom periodu 2017. - 2021. godina, preduzimao sam poslove i zadatke u cilju efikasnog rukovođenja Upravom policije u izvršavanju poslova i zadataka propisanih u članu 20. Zakona u cilju osiguranja što većeg nivoa lične i imovinske sigurnosti na području Kantona Sarajevo.

Tokom izvještajnog perioda preduzeo sam slijedeće mjere i radnje:

I Predstavljao sam Upravu policije neposrednim učešćem i radnim angažmanom kroz različite oblike komunikacije s vladinim agencijama i nevladinim organizacijama, međunarodnim organizacijama i predstavništvima, a sve s ciljem stvaranja povoljnije sigurnosne situacije na području Kantona Sarajevo, stručne edukacije policijskih službenika Uprave policije, efikasnije i bolje realizacije naloženih vještačenja, bolje suradnje s policijskim agencijama u BiH i pravosudnim organima, prvenstveno Kantonalnim tužilaštvom Kantona Sarajevo.

Radi osiguranja što bolje suradnje, pripreme i realizacije projekata koji se zajednički provode na području Kantona Sarajevo u cilju izgradnje što boljeg razumijevanja i suradnje s lokalnom zajednicom, kao i stručne edukacije policijskih službenika Uprave policije na međunarodnom nivou i podizanja sigurnosti uposlenika diplomatsko-konzularnih predstavništava u BiH sa sjedištem na području Kantona Sarajevo, prisustvovao sam slijedećim sastancima: dana 30.08., 17.09. i 27.09.2018. godine s predstavnicima ICITAP-a u BiH, dana 21.07. i 15.08.2018. godine s predstavnicima EUFOR-a u BiH, dana 20.09.2018. godine s predstavnicima OHR-a BiH.

U cilju što boljeg razumijevanja i suradnje s lokalnom zajednicom dana 04.07.2018. godine održan je sastanak s direktorom Sarajevo film festivala, na kojem su dogovorene aktivnosti Uprave policije na osiguranju sigurnog ambijenta za održavanje navedene međunarodne kulturne manifestacije. Dana 27.08.2018. godine održan je sastanak s predstavnicima Općinskog vijeća Vogošća, a u cilju prevazilaženja problema s kojim se susreće lokalna zajednica.

Kako bi se ostvarila što bolja suradnja i komunikacija Uprave policije s drugim policijskim agencijama u BiH i F BiH, dana 13.09. i 14.09.2018. godine prisustvovao sam sastanku koordinacije Federalne uprave policije i kantonalnih Uprava policije, na kojima je pored stanja sigurnosti na području F BiH, bilo govora o povećanom broju migranata na području F BiH i nenajavljenim okupljanjima građana. Dana 02.08.2018. godine održan je radni sastanak s predstavnicima MUP-a

Unsko-sanskog kantona, a 15.08.2018. godine prisustvovao sam obilježavanju dana policije MUP-a Zeničko-dobojskog kantona. Dana 16.08.2018. godine održan je radni sastanak s predstavnicima Policijske uprave Istočno Sarajevo s ciljem ostvarivanja što bolje suradnje i poboljšanja stanja sigurnosti na području kantona.

U smislu što bolje suradnje s pravosudnim institucijama dana 24.07., i 28.09.2018. godine održan je radni sastanak s glavnim tužiteljem Kantonalnog tužilaštva Kantona Sarajevo, a dana 15.08.2018. godine s premijerom Vlade Kantona Sarajevo i glavnim tužiteljem Kantonalnog tužilaštva Kantona Sarajevo..

Kako bi Uprava policije MUP-a Kantona Sarajevo što bolje odgovorila zadacima vezanim za rješavanje problema koji se javljaju zbog prisustva sve većeg broja migranata na području F BiH i Kantona Sarajevo, prisustvovao sam sastanku: s predstavnicima UN-a u BiH dana 22.09.2018. godine.

Sukladno odredbama Zakona i obavezama informisanja Vlade i Skupštine Kantona Sarajevo, kao i skupštinskih komisija o stanju sigurnosti na području Kantona Sarajevo, dana 12.07., 26.07., 16.08. 24.08. i 30.08.2018. godine prisustvovao sam sjednicama Vlade Kantona na kojima su razmatrane informacije o stanju sigurnosti za mjesece juni, juli i august 2018. godine, te period januar – juni 2018. godine, koje su i usvojene bez posebnih preporuka Vlade. Dana 24.07.2018. godine prisustvovao sam sastanku s premijerom Vlade Kantona Sarajevo.

Dana 29.04., 27.04. i 21.06.2018. godine prisustvovao sam sjednici Komisije za sigurnost Skupštine Kantona, a dana 06.09.2018. godine prisustvovao sam zasjedanju Skupštine Kantona Sarajevo na kojem je usvojen Zakon o policijskim službenicima Kantona Sarajevo.

II Neposredno ili putem Odjeljenja za odnose s javnošću redovno sam informirao javnost o radu i aktivnostima Uprave policije. U tom smislu za vremenski period juli - septembar 2018. godine urađeno je slijedeće:

- poslato dnevnih obavijesti pisanim i elektronskim medijima	459
- poslato saopštenja za javnost	48
- dato intervjuua za elektronske medije	101
- zaprimljeno zahtjeva pisanih i elektronskih medija	136
- održano pres konferencija	1
- gostovanje u TV i radio emisijama u studiju	21

Kampanja Neko te voli, koja je imala za cilj smanje upotrebe mobilnih telefona od strane vozača i povećanje sigurnosti svih učesnika u saobraćaju uspješno je okončana 15.09.2018. godine.

Kontinuirano se unaprjeđuje saradnja s elektronskim medijima, dnevnim i sedmičnim listovima u Bosni i Hercegovini i inostranstvu, koji su objavili veći broj vijesti i intervjuua u vezi s stanjem kriminaliteta, javnog reda i mira, sigurnosti saobraćaja, primjeni filozofije rada policije u zajednici, osiguranju javnih skupova na području Kantona Sarajevo, kao i svim drugim pitanjima iz nadležnosti Uprave policije.

Zvanični web Ministarstva je kvalitetan, redovno se ažurira, te je jedna od najposjećenijih stranica ministarstava unutrašnjih poslova u Bosni i Hercegovini i regiji. U periodu juli-septembar 2018. godine je, na osnovu podataka Google Analytics-a, na zvaničnom web-u Ministarstva zabilježeno 370 518 posjeta, a posjete su zabilježene iz 114 država i 2 446 gradova u svijetu. Web također prati konutinuirano provođenje kampanje Rad policije u zajednici. Informacije i edukativni sadržaji u vezi s kampanjama i projektima Uprave policije su adekvatno predstavljeni i na službenom Twitter profilu i službenom YouTube kanalu Ministarstva. Bitno je napomenuti da je nastavljen rad na prilagođavanju svih sadržaja kreiranih i objavljenih na zvaničnom web-u u cilju omogućavanja korištenja web-a slijepim i slabovidnim osobama.

Određeni broj selektiranih informacija se objavljuje i na službenom Twitter profilu MUP-a Kantona Sarajevo. Naš Twitter nalog trenutno ima 371 registrovanih "pratilaca" i taj broj se svakodnevno povećava, a povratne informacije ukazuju na to da se na ovaj način poboljšala komunikacija s javnosti.

Dana 15.01.2018. godine aktiviran je službeni YouTube kanal Ministarstva, na kojem je do sada obrađeno i postavljenò 20 video sadržaja, i koji trenutno ima 163 "pretplatnika" i 14 790 pregleda, uz napomenu da nisu registrovani negativni komentari na objavljene sadržaje.

**III** Statistički pokazatelji stanja kriminaliteta, javnog reda i mira i sigurnosti saobraćaja na području Kantona Sarajevo u periodu juli-septembar 2018. godine ukazuju da je stanje sigurnosti na području Kantona Sarajevo na većem nivou u odnosu na prethodnu godinu kada je u pitanju broj otuđenih motornih vozila, te stanje javnog reda i mira i sigurnosti saobraćaja na putevima. Broj registrovanih krivičnih djela je blago povećan, a povećanje broja registrovanih krivičnih djela se odnosi na krivična djela protiv zdravlja ljudi, što predstavlja rezultat pojačanih aktivnosti Sektora kriminalističke policije – Odjeljenja za borbu protiv zloupotrebe opojnih droga.

Iz analize statističkih pokazatelja, proizilazi da su sve do sada preduzete preventivne mjere i radnje, prvenstveno pozorno-patrolna djelatnost, rad policije u zajednici, kampanje i projekti koji se provode u okviru djelokruga rada Uprave policije, u trećem kvartalu 2018. godine provedene efikasno i da su dale jasno mjerljive rezultate.

Uprava policije će i u narednom periodu, a u skladu s Programom rada Uprave policije za 2018. godinu i akcionim planovima svojih osnovnih i unutrašnjih organizacionih jedinica, nastaviti s provođenjem efikasnih preventivnih mjera i radnji s ciljem postizanja još većeg nivoa stepena sigurnosti, kroz pozorno-patrolnu djelatnost na čitavom području kantona, kao i rad policije u zajednici, a naročito će se posvetiti pažnja planiranju konkretnih aktivnosti u cilju smanjenja broja izvršenih krivičnih djela, s posebnim akcentom na krivična djela protiv života i tijela i krivična djela protiv imovine, naročito krivična djela razbojništva, teških krađa u stambene objekte i teških krađa motornih vozila. Nastaviće se provođenje planskih aktivnosti preventivno-represivnog djelovanja na počinioce najtežih oblika prekršaja iz oblasti Zakona o sigurnosti saobraćaja na putevima BiH, s posebnim akcentom na prekršaje koji se odnose na prekoračenje dozvoljene brzine kretanja motornih vozila i suzbijanje pojave tzv "uličnih trkača", prolazak kroz raskrscnicu kada je upaljen znak crvenog svijetla i slično, a posebna pažnja će se posvetiti i sigurnosti motociklista, biciklista i pješaka, kao učesnika u saobraćaju, s obzirom da se njihov broj, s nastupanjem lijepog vremena, svakodnevno povećava.

Tokom izvještajnog perioda Uprava policije MUP-a Kantona Sarajevo je osigurala 744 javna skupa,

od kojeg broja 185 s kontradiverzionim osiguranjem, na kojima je samo u dva slučaja došlo do narušavanja javnog reda i mira, kada su protestanti iz kategorije demobilisanih boraca, prilikom nenajavljenog okupljanja ispred objekta Parlamenta F BiH, fizički napali novinare portala Klix i Al Džezira, zbog kojeg incidenta su nadležnom tužilaštvu dostavljeni službeni izvještaji o počinjenim krivičnim djelima Laka tjelesna povreda i Nasilničko ponašanje protiv 2 osobe i kada su se protestantni iz kategorije demobilisanih boraca, prilikom nenajavljenog okupljanja ispred objekta Parlamenta F BiH, fizički sukobili s policijskim službenicima prilikom pokušaja blokade gradske saobraćajnice, dok su ostali javni skupovi prošli bez incidenata.

U periodu juli – septembar 2018. godine, u cilju podizanja stepena sigurnosti na području Kantona Sarajevo na viši nivo, izgradnje povjerenja između Uprave policije i lokalne zajednice, te poštivanja zakonitosti u radu svih policijskih službenika, preduzeo sam slijedeće:

- U skladu s depešom 02-17 od 27.04.2018. godine, kontinuirano se provodi vanredni unutrašnji nadzor u organizacionim jednicama Uprave policije,
- U sklopu projekta Rad policije u zajednici, a na osnovu ostvarenih kontakata s direktorima i pedagogima osnovnih škola na području Kantona Sarajevo, u cilju stvaranja uvjeta za nesmetano i sigurno odvijanje nastavnog procesa, u prvom polugodištu školske 2018/2019. godine u školama su organizirane i provedene edukativne radionice na slijedeće teme “Djeca u saobraćaju” i “Međuvršnjačko nasilje”.
- Započelo je drugi dio permanentne obuke policijskih službenika od čina policajac do čina mlađi inspektor, a u skladu s Planom i programom stručnog usavršavanja policijskih službenika u 2018. godini.
- Preduzeo sam sve aktivnosti iz nadležnosti policijskog komesara za uspostavu sigurnosnog područja za rukovanje tajnim podacima u Ministarstvu i za opremanje prostorija za rad s djecom i maloljetnicima u skladu s Zakonom o postupanju s djecom i maloljetnicima u krivičnim postupku Federacije BiH.
- U skladu s pozivom Ministarstva sigurnosti BiH, upućenom na osnovu poziva MUP-a Republike Hrvatske za realizaciju projekta međunarodne suradnje i podrške policijskim službenicima tokom ljetnje sezone, Uprava policije MUP-a Kantona Sarajevo je uputila dva policijska službenika, koji su tokom mjesec dana pružili pomoć policijskim službenicima MUP-a Republike Hrvatske u izvršavanju redovnih poslova i zadataka tokom turističke sezone.

Sve konkretne aktivnosti, tokom izvještajnog perioda, preduzimao sam uvažavajući prioritete određene od strane Vlade Kantona Sarajevo, uz vrlo dobru saradnju s ministrom Mulabdić Vedranom.

IV U izvještajnom periodu, pored prioriteta određenih od strane Vlade Kantona Sarajevo i planskih prioriteta Uprave policije koji se odnose na efikasne preventivne mjere i radnje (pozorno-patrolna djelatnost, rad policije u zajednici, kampanje i sl.), složenije operativne aktivnosti usmjerene na

rasvjetljavanje najtežih i najsloženijih krivičnih djela, akcenat sam dao na normativnu djelatnost za koju sam ovlašten u dva oblika: donošenje propisa po osnovu izričite zakonske odredbe ili dostavljanjem ministru nacrtu i prijedloga propisa ili izmjenom i dopunom propisa iz djelokruga rada Uprave policije (član 23. stav 3. tačka d) Zakona).

U gore navedenom vremenskom periodu, pored ostalog, preduzeo sam slijedeće:

- U okviru svojih nadležnosti, redovno sam učestvovao u radu Zakonodavno-pravne komisije Skupštine Kantona Sarajevo u proceduri donošenja novog Zakona o policijskim službenicima Kantona Sarajevo, Zakona o plaćama i naknadama policijskih službenika Kantona Sarajevo i izrade Zakona o izmjenama i dopunama Zakona o javnom okupljanju Kantona Sarajevo,
- Potpisan je Memorandum o suradnji između Finansijsko – informatičke agencije i Uprave policije MUP-a Kantona Sarajevo.
- U okviru nadležnosti policijskog komesara Uprave policije, a s ciljem poboljšanja rada i blagovremenog protoka informacija, svakog mjeseca, nakon izrade informacije o stanju sigurnosti na području Kantona Sarajevo, održava se redovni Stručni kolegij Uprave policije, dok se kolegij sa šefom Ureda, načelnicima Sektora uniformisane policije, Sektora kriminalističke policije, Sektora za policijsku podršku i Jedinice za profesionalne standarde i pomoćnicima komesara Sektora za pravne, kadrovske i logističke poslove, edukaciju i analitiku i Sektora za materijalno-finansijske poslove održavaju jednom sedmično. Na svim kolegijima se razmatra stanje po oblastima rada, te iznalaze modusi za rješavanje problema koji se javljaju u radu.
- U skladu sa svojom nadležnosti učestvovao sam u radu Komisije za sigurnost Skupštine Kantona Sarajevo, koju sam redovno informirao o stanju sigurnosti na području Kantona Sarajevo i mjerama i radnjama koje će policijski službenici Uprave policije poduzimati u cilju poboljšanja iste.
- Na osnovu izvještaja o rezultatima bezbjedonosne provjere, za pet policijskih službenika Uprave policije MUP-a Kantona Sarajevo donešena su rješenja o postojanju sigurnosnih smetnji, te su rukovodiocima organizacionih jedinica, u kojima su isti raspoređeni, i Odjeljenju za unutrašnju kontrolu date upute za postupanje u vezi navedenih izvještaja i rješenja, a u toku su postupci po žalbama koje su na rješenja o postojanju sigurnosnih smetnji dostavili policijski službenici.

V U oblasti upravnog rješavanja, redovno sam, u zakonskom roku, donosio odluke koje su, po odredbama Zakona o nabavljanju, držanju i nošenju oružja i municije i drugih propisa, u mojoj nadležnosti, odnosno nadležnosti Uprave policije.

Tokom izvještajnog perioda, ažurno, prema planiranoj i datoj dinamici, u oblasti upravnog rješavanja donosio sam odluke koje se odnose na radnopravni status svih zaposlenika Uprave policije od kojih su: policijski službenici 1444, državni službenici 16 i namještenici 163. Odluke su se najčešće odnosile na prava iz radnog odnosa, a u vezi s provedbom odredbi Pravilnika o unutrašnjoj organizaciji MUP-a Kantona Sarajevo, koji je stupio na snagu odlukom Vlade Kantona Sarajevo broj 02-05-2363-8.1/17 od 17.07.2017. godine. Navedenim Pravilnikom u Upravi policije sistematizovano je 1984 radnih mjesta, od čega 1729 policijskih službenika, 42 državna službenika, od kojih 2 rukovodioca osnovnih organizacionih jedinica i 5 rukovodilaca unutrašnjih

organizacionih jedinica, te 213 namještenika, od kojih je jedan rukovodilac unutrašnje organizacione jedinice.

U izvještajnom periodu završena je procedura za unaprjeđenje policijskih službenika u čin narednik, te sam na prijedlog komisija za unaprjeđenje policijskih službenika, donio rješenja o dodijeljenom činu i rasporedu za 94 policijska službenika unaprjeđenih u čin narednik.

U toku su procedure za unaprjeđenje policijskih službenika u čin samostalni inspektor za 10 radnih mjesta i u čin mlađi inspektor za 117 radnih mjesta.

U periodu juli – septembar 2018. godine nije donešeno niti jedno rješenje po osnovu sticanja prava na penziju, dok sam na osnovu dva lična zahtjeva policijskih službenika za sporazumni prekid radnog odnosa, donio rješenja o prekidu radnog odnosa.

Donosio sam rješenja o premještanju, plaćenom odsustvu, o refundaciji troškova mobitela kao i druge akte, rješenja, odluke i uvjerenja koja se odnose na radno-pravni status uposlenika Uprave policije. Davao sam izjašnjenja na tužbe po zahtjevima nadležnih organa, a najveći broj njih odnosio se na oblasti radnopравnih i imovinskopravnih sporova.

Tokom izvještajnog perioda izrečeno je 7 sankcija policijskim službenicima zbog lakših povreda službene dužnosti.

Redovno sam pratio i davao podršku radu disciplinskih tijela (disciplinska komisija i tužilac), kao i radu Odbora za žalbe javnosti Skupštine Kantona Sarajevo.

**VI** Obzirom da je borba protiv korupcije prioritet i jedan od bitnih uvjeta za ukupan rad Uprave policije kojom, u skladu s odredbama Zakona, rukovodim, dao sam akcenat na efikasnost rada svih operativnih tijela i mehanizama u ovoj oblasti, a po potrebi se i neposredno uključivao. Sve ove aktivnosti provođene su u skladu s programskim dokumentima Vlade Kantona Sarajevo u ovoj oblasti, kao i strateških dokumenata i planova viših nivoa. Ministarstvo, a u okviru njega i Uprava policije, je usvojilo niz strateških planskih dokumenata u oblasti borbe protiv korupcije (Strategija, Plan 2017. - 2021. i dr.). Osigurao sam sve potrebne uvjete za rad Operativnog tima za borbu protiv korupcije, Jedinice za profesionalne standarde i nadležnog Odjeljenja u Sektoru kriminalističke policije, neposredno vršio nadzor nad radom istih i time iskazao senzibilitet i dao istinski doprinos efikasnoj borbi protiv korupcije, kao jednoj od najopasnijih i najštetnijih pojava, kako u vlastitim redovima, tako i u društvu uopće. U izvještajnom periodu, Operativni tim za borbu protiv korupcije nije zaprimio niti jednu žalbu koja se odnosi na postojanje osnova sumnje da je počinjeno krivično djelo navedeno u Strategiji borbe protiv korupcije u MUP-u Kantona Sarajevo. Operativni tim o svome radu, policijskom komesaru dostavlja pismeni izvještaj na mjesečnom nivou, koji se dostavlja na uvid i Nezavisnom odboru Skupštine Kantona. Uprava policije kroz permanentnu obuku vrši kontinuiranu edukaciju policijskih službenika, kao i kroz obuku državnih službenika i namještenika u oblasti borbe protiv korupcije, a upućivanjem

policijskih službenika na tematske radne sastanke (ad hoc ili kontinuirano), specijalističku obuku, seminare i sl., vrši se dodatno osposobljavanje i specijalizacija kadrovskih potencijala u oblasti borbe protiv korupcije.

**VII** U okviru redovnih aktivnosti, shodno usvojenom Budžetu, u dijelu koji se odnosi na Upravu policije, preduzima sam mjere i radnje na nabavci materijalno-tehničkih sredstava potrebnih za rad Uprave policije, a u cilju povećanja efikasnosti i modernizacije rada. U izvještajnom periodu, Uprava policije je, u skladu s Budžetom Uprave policije za 2018. godinu i planiranim strateškim ulaganjima, pripremila tendersku dokumentaciju i provela tendersku proceduru za velike projekte- nabavka službenih motornih vozila, nabavka oružja za vodove za sprječavanje narušavanja javnog reda i mira u većem obimu, nabavka policijske opreme za vodove za sprječavanje narušavanja javnog reda i mira u većem obimu, nabavka kućišta za stacionarne radare, nabavka policijskih uniformi čiji je rok upotrebe istekao. Ministarstvu finansija Kantona Sarajevo dostavljen je okvirni Budžet za period 2019.-2021. godina

**VIII** Na zahtjev ministra i po ukazanoj potrebi, dostavlja sam izvještaje i informacije u skladu s Pravilnikom o redovnom izvještavanju ministra o poduzetim aktivnostima Uprave policije i o događajima i rezultatima poduzetih aktivnosti koje imaju značaj za sigurnost građana i interese Kantona Sarajevo broj 01-22/17 od 28.03.2017. godine.

Predlagao sam sastav komisija koje formira ministar.

Putem nadležnih Sektora i Odjeljenja, u skladu s odredbama Pravilnika o redovnom izvještavanju ministra o poduzetim aktivnostima Uprave policije i o događajima i rezultatima poduzetih aktivnosti koje imaju značaj za sigurnost građana i interese Kantona Sarajevo broj 01-22/17 od 28.03.2017. godine, preduzeo sam mjere na organizaciji i funkcionisanju jedinstvenog sistema izvještavanja i obrade podataka neophodnih za vršenje poslova iz nadležnosti Uprave policije.

Prilikom obrade podataka postupa se po uspostavljenom sistemu zaštite osobnih podataka, kao i po dostignutom stepenu razvoja sistema zaštite tajnih podataka.

Putem nadležnog Sektora, po potrebi, i u skladu sa zakonskom procedurom raspisivao sam kantonalne potrage i oglašavao raspisane potrage.

Učestvovao sam na sastanku Koordinacije direktora Federalne uprave policije i policijskih komesara kantonalnih Ministarstava unutrašnjih poslova, i uzimao aktivno učešće i davao određene prijedloge o unapređenju saradnje između policijskih agencija na rješavanju sigurnosnih izazova i prijetnji, koji je održan dana 13. i 14.09.2018. godine i na kojem je razmatran izvještaj o radu za period januar-august 2018. godine, kao i druga pitanja iz oblasti sigurnosti i uspostavi standarda jedinstvenog postupanja policijskih službenika na području Federacije, posebno kada je u pitanju prisustvo sve većeg broja migranata na području F BiH i postupanje u vezi s nenajavljenim protestnim okupljanjima građana na području F BiH.

U skladu s odredbama Instrukcije o međusobnom izvještavanju o pojavama u oblasti javne sigurnosti između Federalnog ministarstva unutrašnjih poslova i kantonalnih Ministarstava unutrašnjih poslova



o pitanjima koja su od interesa za sigurnost Federacije Bosne i Hercegovine, broj 09-1608 od 26.07.2007. godine, kao i drugih propisa i procedura, ispred Uprave policije podnosio sam informacije i statističke podatke Federalnom ministarstvu unutrašnjih poslova, a naročito u vezi s poslovima iz zajedničke nadležnosti kantona i Federacije BiH, kao i poslovima iz nadležnosti Federacije, koji su povjereni Ministarstvu, odnosno Upravi policije.

Putem nadležnih Sektora u Upravi policije osiguravao sam zakoniti i profesionalan policijski odgovor na sve događaje koji mogu imati bilo kakave implikacije na sigurnost, te i na taj način davao doprinos poboljšanju sigurnosne situacije na području Kantona Sarajevo.

**IX** Tokom izvještajnog perioda, ostvarivao sam komunikaciju i izvještavao Nezavisni odbor o rezultatima i prioritetima rada Uprave policije, te u tom smislu na raspolaganje stavio sve podatke i dokumentaciju, kako bi isti mogao preduzimati poslove i zadatke iz svoje nadležnosti. O svim događajima na području Kantona Sarajevo, a koji su interesantni s aspekta sigurnosti, Nezavisnom odboru se dostavljaju detaljne informacije.

Sjednicama Nezavisnog odbora prisustvovao sam dana 24.07. i 20.09.2018. godine, kada su razmatrane i usvojene informacije o stanju sigurnosti za mjesec juni, juli i august 2018. godine i za period januar – juni 2018. godine, kao i izvještaj o radu policijskog komesara za period april – juni 2018. godine.

Sve naprijed navedene aktivnosti, provodio sam s ciljem postizanja višeg nivoa primjene demokratskih principa i efikasnosti u radu Uprave policije, zaštite ljudskih prava i sloboda svih građana i postizanja višeg nivoa lične i imovinske sigurnosti na području Kantona Sarajevo.

Broj: 02- 274 /18  
Datum: 15.10.2018. godine

**POLICIJSKI KOMESAR**  
**Generalni inspektor policije**

**Mevludin Halilović**

